

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 205 del 02/02/2024

Traduzione in ladino

“Leggende delle Dolomiti”: contèr e fèr coi materiali del bosch e co la creida

[Ladino] Biblioteca della Montagna SAT e l Laboratorio Alpino e delle Dolomiti Bene Unesco i à portà dant, aló dal Spazio Alpino de la SAT, l projet e la mostra “Leggende delle Dolomiti: raccontare e creare con i materiali del bosco e con l’argilla”, n viac-laboratorie tel misterious e fascinegol raion dolomitan, aldò del liber “Misteres, aventures e magica creatures. La Val de Fascia anter fantasia e realtà” de Alberta Rossi.

A la scontrèda à tout pèrt, anter i etres: la presidenta de la SAT, Anna Facchini; la vicepresidente e assessora a l’istruzion, cultura e sport de la Provinzia, Francesca Gerosa; l’assessora del Comun de Trent, Monica Baggia; la diretora Ofize sistem provinzièl de la arees stravardèdes, Sara Zappini.

À tout pèrt ence i bec de la **scola populèra Aldo Schmid de Trent** e de la **scola Creativity Garden de Riva del Garda**, autores de la operes metudes fora che i à contà de l’esperienza manuèla del lurèr la creida, nasciuda da la conties del percors didatich de chel che se à cruzià l laboratorie ceramiche Elel de Poza. I bec i à raprejentà emozions, personajes e conties ence tras l lurier manuèl duran elemenc naturèi desche piotoi, rames, foes e n muie de etres materièi che i é doventé te sia mans material per se rejonèr.

“Chesta mostra – à despiegà **Alberta Rossi, autora del liber, che à portà dant l projet** – la vegn ca da sie scontrèdes endrezèdes da la Biblioteca della Montagna Sat de Trent tel chèder del Laboratorio alpino e delle Dolomiti bene UNESCO sostegnù en colaborazion co la Provinzia autonoma de Trent – Servije arees stravardèdes.

Te vigni scontrèda, tras la contia de Sèn Nicolò, ge aon fat cognoscer ai bec la particolaritèdes de la Dolomites ge moscian lesc, inomes di pic de la monts, fenomens tipics de la Dolomites, col portèr dant ence vèlch element particulèr desche l inom e l lengaz de sie popul veior: i ladins, col ge despieghèr ducant a na vida sorida.”

Coscita Anna Facchini, presidenta de SAT: “L é na gran sodesfazion poder portèr dant l resultat de chest laboratorie, che l é stat possibol de gra a la colaborazion scomenzèda del 2016 co la sottoscrizion de na convenzion aposta co la PAT per la valorisazion de la Dolomiti Bene UNESCO. La SAT la l fèsc tras l servije e l lurier de sia Biblioteca della Montagna, col endrezèr outa per outa colaboracions con voluntadives, sociazions, scoles e, desche te chesta ocasion, con artis che vigni outa porta dant sia performance. Chesta l é na vida per entener i enteresc, per mescedèr cultures e formes de esprescion de cheles che l Trentin, e donca ence la SAT, l é rich.”

N batiman a la scomenzadiva l é stat fat ence da **Monica Baggia, assessora a l’Urbanistica del Comun de Trent:** “Chesta scomenzadiva l é n bel ejempie de coche se pel se arvejinèr a la monts e en generèl al ambient de nosc raion a na vida creativa e piagegola. Da na man l é la storia, la tradizions, la lejendes, da l’altra l é la carateristiches fora de anter de la valèdes e di pic dolomitans: chest patrimonie de cognoscenza, che n’outa l era pèrt de la vita de vigni di e de la cultura materièla di trentins, l é stat lurà fora da nef e tout

su tras la दौरa de chisc materiai purec leé al Trentin. L bosch l é ruà te clasc e l à soscedà la fantasia di bec, che segur de gra a chesta esperienza i à tout su na maor consaputa en cont di lesc olache i vif”.

La vizepresidenta de la Provinzia Francesca Gerosa l’ à sottrissà con gaissa l valor del projet, col l meter dant no demò desche na esposizion fora de anter e fascinegola, ma ence desche n melaur didatich per la scoles. “Pissave ai bec che i se mateea con materiai naturèi touc su tel bosch e co la creida” l’ à scomenzà l’ assessora, “no i é demò do a se lascèr fora con sia creatività, ma i é ence do che i va ite te na contia che la encroja passà e prejent, col mudèr l aprendiment te na aventura da no poder desmentier.” L’ assessora dapodò l’ à volù sottrissèr coche chest projet sie na vida inovativa per jontèr ite te la ativitàes educatives la lejendes e la mitologia de nosc raion alpin. “L é na vida per soscedèr la curiosità di bec, per ge fèr aprijier la beleza e la richeza de la Dolomites e del Trentin, e per portèr dant na maor consaputa ambientèla”, l’ à dit amò apede. Ma no l é demò chest. L’ assessora l’ à sottrissà che l projet l é ence n investment te l’ identità culturèla de la joena generazions, na vida per ge fèr cognoscer e aprijier la storia locala. “L é na vida acioche i bec i vegne gregn con n fon sentiment de partegnuda e de respet per olache i vif”, l’ à dit en ultima.

Aló da Spazio Alpino, estra che co la mostra, la contia la é stata portèda dant “sun paladina”. I bec i à viventà la contia e, con cianties e i guants fac da la maestres, i à encantessimà duc col doventèr per na dì i personajes de la lejenda. **L grop de musega Damiana Dellantonio Trio** l à enterzà la paroles co la musega, col ge fèr cognoscer ai bec dotrei cianties populères per ladin metudes ensema con n stil modern.

La mostra la è averta enscin a en jebia ai 15 de firé del 2024. Oraries: dal lunesc a la jebia, da les trei domesdì a les sie da sera. Entrèda: deban.

Traduzion di Servijes Linguistics e Culturèi del Comun general de Fascia

(cdt)